

Nuummi, Sisimiuni Ilulissanilu ivigaasanik qallikkanik arsaattarfiliornissap pilersaarusiorneqarnissaanut 2012-mi Aningaasanut Inatsisissatut siunnersummi aningaasanik immikkoortitsinissamik Naalakkersuisut peqquneqarnissaannik Inatsisartut aalingiiffigisassaattut siunnersuut.

(Inatsisartunut ilaasortaq Niels Thomsen, Demokraatit)

Akissuteqaat

(Ilaqtariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Aappassaaneerineq

Naalaakkersuisut Kultureqarnermut, Ilinniartitaanermut, Ilisimatusarnermut Ilageeqarnermullu Aataatsimiititaliaq suliap ataatsimiititaliami sukumiisumik sulillutik Nuummi, Sisimiuni Ilulissanilu ivigaasanik qallikkanik arsaattarfiliornissap pilersaarusiorneqarnissaanut aningaasaliisoqarnissaanik siunnersuut isumaliutissiissusiusormassuk.

Naalaakkersuisut tusaatissatut tiguaat ataatsimiititaliami amerlanerussuteqartut AIS 2012-mi illoqarfinni pineqartuni ivigaasanik qallikkanik arsaattarfiliortoqarnissaanut pilersaarusiornissamut aningaasaliisoqarnissaanik siunnersuut tapersermassuk.

Siullermeerinermi Naalaakkersuisut siunnersuuteqartoq isumaqatigaat oqarmat, timigissartarnerup sunnitai inuillu peqqissusiat imminnut ataqtigittut. Isumaliutissiissummi ersippoq ataatsimiititaliap siunnersuuteqartoq isumaqatigigaa, pinaveersaartitsineq pingaaruteqarnerarmagu, piffissarlu ungasinnerusoq eqqarsaatigalugu iluanaaruteqarfiusammat. Aammattaarli Naalaakkersuisut maluginiarpaat ataatsimiititaliaq allammat, maanna tunngavigisat aallaavigalugit nalileruminaattoq arsaattarfiiit ivigaasanik qallikkat pingasut pilersinnerat peqqissutsip nalinginnaasumik pitsangoriarmeranik kinguneqassanersoq, imaluunniit timersornermut tapiissutaasartut nalinginnaasumik qaffanneqarnerpata peqqissutsimut iluaqtaanerussannginnersoq.

Ataatsimiititaliap siunnersuutip suliarinerani immikkut pingaartissimavaa misissussallugu, siunnersuutip aningaasaqarnikkut Namminersorlutik Oqartussanut kommuninullu kinguneriumaagaasa suujumaarneri. Taamaalilluni aamma Ataatsimiititaliap maluginiarpa siunnersuuteqartup qanoq ililluni aningaasalersuinissaq innersuutinngimmag, kisiannili inassutigalugu Naalaakkersuisut peqquneqassasut 2012-mi aningaasanut inatsisissatut siunnersummi siunertamut atugassanik nassaarniaqqullugit.

Inatsisartunut ilaasortap Niels Thomsenip aalajangiiffigisassatut siunnersuutaani pineqarpoq arsaattarfiiit ivigaasanik qallikkat pilersaarusiornissaanut aningaasaliinissaq, aallaavigineqarluni pilersitsinermi aningaasartuutit naatsorsuutigineqartut 15 mio. kr. missaannissasut, Qaqortumi ivigaasanik qallikkanik arsaattarfiliornermut aningaasartuutit aallaavigineqarpata. Ataatsimiititaliap aningaasat pineqartut toqqaannartumik isummerfiginngilai, nalilerluguli amerlanerusinnaasut ikinnerullutiluunniit.

Ataatsimiititaliap isumaliutissiissummini eqqaavaa, ataatsimiititaliap kissaatiginartikkaluarmagu KANUKOKA-p tusarniaavigineqarsimanissaa. Tamanna Naalaakkersuisut isumaqatigaat, innersuuk-kumalluguli Naalaakkersuisut KANUKOKA suleqatigalugu kulturi sunngiffillu pillugit peqqussut nutarterlugu suliaq aallartinnikuummassuk, suliallu tamatuma ilagissammag u kulturimut

sunngiffimmullu atortut suunerisa qulaajarnissaat, pineqartup iluani ataatsimoortumik pilersaarusiortoqarniassamat.

Naalakkersuisut isumaqarput, suliassaqarfik pineqartoq kommunit susassaqarfiinut atasusoq aammalu ivigaasanik qallikkanik arsaattarfiliornissaq pillugu suliap ingerlateqqinnerani kommunit pinngitsooratik ilaatinneqassasut, tassuunakkut pissutsit tamarmik arsaaffit angissusissaannut, pilersaarusiorerannut, sanaartornissaasa aningaasartuutaanissaannut, aningaasaliisinaasunut aserfallatsaaliniermullu tunngasut sukumiisumik misissorneqarsinnaaqqullugit. Tamatuma kingorna aalajangiinissamut tunngavissisoqarpat, kommunit inaarutaasumik aalajangertussajumaarpaat arsaaffit pilersinneqassanersut.

Taama oqaaseqarlutik Naalakkersuisut Nuummi, Sisimiuni Ilulissanilu ivigaasanik qallikkanik arsaattarfiliornissap pilersaarusiorneqarnissaanut 2012-mi Aningaasanut Inatsisissatut siunnersuummi aningaasanik immikkoortitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut tusaatissatut tiguaat.